

Fuad Tahirović, diplomirani inženjer geodezije



Dana 13.11.2020. godine na bolji svijet preselio je kolega Fuad - Fuko Tahirović. Cijeli travnički kraj poznao je ovog vrsnog geodetskog stručnjaka, odličnog znalca katastra i gruntovnice. Naš rahmetli Fuad Tahirović rođen je 12.08.1956. godine u Travniku. Osnovnu školu kao i Građevinsku tehničku školu završio je u Travniku.

Zvanje diplomiranog inženjera geodezije je stekao 1982. godine, diplomiravši na Geodetskom odsjeku Građevinskog fakulteta u Sarajevu. Odmah nakon diplomiranja je počeo raditi u Međuopštinskoj geodetskoj upravi Novi Travnik i Travnik. Kolega

Fuad je bio vrstan stručnjak na poslovima inženjerske geodezije, te dugogodišnji šef Odsjeka za katastar općine Travnik gdje je proveo cijeli svoj radni vijek. Značajan je njegov angažman na početku uspostave "Katastra komunalnih uređaja" u Općini Travnik potom pomoć na uspostavi "Etažne knjige" u zemljišno knjižnom uredu Općinskog suda u Travniku, te poslijeratna uspostava Katastarskog operata u općini Novi Travnik. Poznat po veselom duhu uvijek je bio spreman za šalu i dosjetke, pa i na svoj račun. Porodični život proveo je sa suprugom Jasminom, kćerkom Aminom i sinom Seadom. Smrću našeg kolege Fuada - "Fuke" izgubili smo čestitog čovjeka, kolegu uvijek spremnog za pomoć drugima, koji je nesebično prenosio svoje veliko znanje na mlađe kolege. Geodetska struka je izgubila vrsnog stručnjaka, koji je zračio otvorenosti i spremnošću za rješavanje svih predmeta iz oblasti katastra. Posebno je mene kao njegovog najbližeg kolegu pogodio njegov prerani odlazak, jer sam prve katastarske korake naučio i prešao sa rahmetli Fuadom. Osim što smo bili kolege po struci, bili smo i prijatelji. Dženaza našem Fuadu obavljena je dana 15.11.2020. godine na mezarju Kupilo - Bašbunar u Travniku. I pored mjera predostrožnosti (preporučenih radi sprječavanja širenja pandemije uzrokovane virusom COVID-19) posljednjem ispraćaju našeg Fuke prisustvovala je rodbina, veliki broj prijatelja iz travničke čaršije, radnih kolega i sugrađana.

Da mu se Bog dragi smiluje i uvede ga u dženetske bašće ...

Vekas Njegović